

Gabem perhebat ekonomi Melayu

Jentera memperkasa bangsa cetusan aspirasi MT Umno

Oleh **Azman Zakaria**

KUALALUMPUR: Gagasan Badan Ekonomi Melayu (Gabem) yang dilancarkan Perdana Menteri, Datuk Seri Abdullah Ahmad Badawi semalam, adalah cetusan aspirasi Majlis Tertinggi Umno untuk melihat dan memastikan ekonomi bangsa Melayu dibangunkan ke tahap yang boleh menjamin masa depan bangsa.

Visinya adalah melahirkan Melayu berprestasi tinggi dalam ekonomi, manakala misinya adalah sebagai jentera memobilisasi pemuafakatan pemimpin, badan ekonomi, tokoh korporat dan sarjana ekonomi Melayu ke arah memperkasa bangsa menuju 2020.

FAKTA

Fungsi Gabem

- Mendorong dan mencetus kesadaran masyarakat Melayu terhadap isu ekonomi.
- Menyalur pendapat pemimpin Melayu dalam NGO ekonomi untuk perhatian dan tindakan kerajaan dan kepada golongan sasaran dalam masyarakat Melayu.
- Memangkin gerak kerja memperkasa ekonomi Melayu.

Penubuhannya lahir daripada usul dan syor perwakilan pada Perhimpunan Agung Umno 2005 yang mahukan parti itu memperhebat usaha memperkasa ekonomi bangsa, membasmi kemiskinan dan merapatkan jurang ekonomi antara kaum.

Perdana Menteri, adalah Penaung 1 Gabem manakala timbalannya, Datuk Seri Najib Razak sebagai Penaung 2. Menteri Besar Selangor, Datuk Seri Dr Mohamad Khir Toyo sebagai penasihat, manakala Ahli Majlis Tertinggi, Tan Sri Rahim Tamby Chik (pengerusi).

Gabem beroperasi sebagai payung kepada semua Persatuan dan pelbagai kumpulan ekonomi Melayu di seluruh negara, yang melalui pemuafakatan itu ekonomi bangsa Melayu dapat diperkasakan.

Antara lain, ia bertanggungjawab merapatkan jurang ekonomi antara kaum dengan meningkatkan taraf ekonomi Melayu dalam 11 kelompok terpenting.

ia juga membantu pembangunan Masyarakat Perdagangan dan Perindustrian Bumiputera (MP-PB) yang berjaya sebagai peneraju utama usaha memperkasa ekonomi orang Melayu.

Selain itu, Gabem juga akan terabit menjalankan gerak inovasi ekonomi Bumiputera supaya Melayu lebih mampu bersaing melalui ketajaman kreativiti serta kecekapan teknologi.



UNTUK MELAYU: Orang ramai termasuk pemimpin dan tokoh korporat menghadiri majlis penubuhan Gabem yang dilancarkan Abdullah di PWTC, semalam.